

**JAMHURI YA MUUNGANO WA TANZANIA
WIZARA YA FEDHA NA MIPANGO**

Anuani ya Ofisi "Hazina - DODOMA"
Simu: +255 26 2963101/9
Fax: +255 26 2963100
Barua pepe : ps@mof.go.tz
(Mawasiliano yote ya kiofisi yaandikwe
kwa Katibu Mkuu wa Hazina)



18 Barabara ya Jakaya Kikwete
Jengo la 'Treasury Square'
Sanduku la Barua 2802,
40468 DODOMA.

Unapojibu tafadhali taja:
Kumb.Na. MG.4/261/01

18 Novemba, 2019

Maafisa Masuuli Wote,
TANZANIA BARA.

**WARAKA WA HAZINA NA. 5 WA MWAKA 2019 KUHUSU
UANZISHAJI NA UTUMIAJI WA MIFUMO YA KIELEKTRONIKI YA
USIMAMIZI WA FEDHA ZA UMMA**

Wakati wa utekelezaji wa Bajeti Serikali imekuwa ikitumia fedha nyingi kwa ajili ya kugharamia ununuzi, uundaji, usimikaji na uendesaji wa mifumo ya kielektroniki ya usimamizi wa fedha za umma kwenye Mafungu mbalimbali. Aidha, imebainika kuwa baadhi ya mifumo hiyo imeanzishwa na kuendelea kutumika bila kufuata utaratibu hususan kupata ridhaa ya Wizara ya Fedha na Mipango kwa mujibu wa sheria, kanuni na miongozo ya usimamizi wa fedha za umma.

Hali hiyo imesababisha changamoto mbalimbali kwa Serikali ikiwemo kuwa na mifumo mingi isiyokuwa ya lazima, kutumia mifumo isiyoleta tija au ufanisi uliokusudiwa na kutopata thamani halisi ya fedha katika kugharamia mifumo hiyo. Aidha, baadhi ya Mafungu na Taasisi za Serikali zimekuwa zikitumia fedha za umma katika ununuzi, uundaji, usimikaji, uendesaji na usimamizi wa mifumo ya kielektroniki isiyokidhi mahitaji ikiwa ni pamoja na kushindwa kubadilishana taarifa na mifumo mingine. Vile vile, baadhi ya Mifumo hiyo imeleta changamoto wakati wa kuandaa hesabu za majumuisho katika viwango vya Kimataifa vinavyotumia mfumo wa IPSAS, Mwongozo wa Kimataifa wa Takwimu za Kifedha (GFSM) wa mwaka 2014, na "Chart of Accounts" iliyohuishwa katika kuhasibu mapato na matumizi pamoja na kutunza taarifa za mikopo, madeni na mali za Mafungu au Taasisi husika.

Katika kukabiliana na changamoto hizo, Serikali imekusudia kupunguza idadi ya mifumo ya kielektroniki isiyokidhi mahitaji na kuathiri upatikanaji wa taarifa muhimu kwa wakati kwa ajili ya kusaidia katika kufanya maamuzi ya uendesaji wa Serikali. Aidha, Serikali imedhamiria kutumia wataalam wa ndani katika kuunda, kusimika, kuendesha na kusimamia mifumo ya kielektroniki ya usimamizi wa fedha za umma. Lengo la hatua hiyo ni kuepusha uvujaji wa taarifa muhimu, kupunguza gharama zinazohusiana na mifumo hiyo, kuongeza tija na ufanisi katika matumizi ya mifumo hiyo kwa kuzingatia mahitaji ya Serikali.

Utekelezaji wa lengo hilo umeanza kwa Wizara ya Fedha na Mipango ikishirikiana na wadau wengine, kuunda mfumo maalum wa kuhasibu mapato na matumizi ya Serikali, ambao umepewa jina la Mfumo wa Malipo Serikalini (MUSE). Mfumo wa MUSE umeundwa kwa kuzingatia matumizi sahihi ya GFSM - 2014 na "Chart of Accounts" iliyohuishwa. Aidha, Mfumo huo unakusudiwa kutumika katika Taasisi zote za Umma ambapo kwa kuanzia umefungwa kwenye Wakala wa Barabara Vijijini (TARURA) na Bodi ya Mfuko wa Barabara.

Katika kufanikisha azma hiyo, Serikali itaendelea kupanua wigo wa matumizi ya Mfumo huo kwa awamu kulingana na mahitaji ya Taasisi mbalimbali. Hivyo, kuanzia tarehe ya waraka huu, Maafisa Masuuli wote mnaelekezwa kuhakikisha mnapata ridhaa ya Wizara ya Fedha na Mipango kabla ya kufanya ununuzi, uundaji, usimikaji na utumiaji wa mfumo wowote wa kielektroniki wa usimamizi wa fedha za umma katika Mafungu au Taasisi zenu. Aidha, mnaelekezwa kufanya tathmini ya ufanisi wa mifumo inayotumika katika usimamizi wa fedha za umma kwenye maeneo yenu na kuwasilisha Wizara ya Fedha na Mipango taarifa inayobainisha changamoto au udhaifu wa mifumo hiyo ili zifanyiwe kazi kwa kujumuishwa katika Mfumo mpya unaoendelea kuundwa kwa ajili hiyo.

Nawatakia utekelezaji mwema.



Doto M. James

**KATIBU MKUU NA
MLIPAJI MKUU WA SERIKALI**

Nakala: Katibu Mkuu Kiongozi,
Ofisi ya Rais - IKULU,
1 Barabara ya Barack Obama,
S.L.P. 9120,
11400 DAR ES SALAAM.

Katibu Mkuu,
Ofisi ya Rais - TAMISEMI,
Mji wa Serikali Mtumba,
S.L.P 1923,
DODOMA.

Katibu Mkuu,
Ofisi ya Waziri Mkuu (Waziri Mkuu na Bunge),
Barabara ya Stesheni,
S.L.P. 3021,
DODOMA.